

[BERITA](#) [SUKAN](#) [DUNIA](#) [HIBURAN](#) [BISNES](#) [RENCANA](#) [WANITA](#) [HIJUNG MINGGU](#) [BH KAPSUL](#) [COVID-19 VAKSIN](#)

OLIMPIK 2020

Pasaran aset digital di Malaysia terus berkembang

Oleh Mahanum Abdul Aziz - Oktober 26, 2021 @ 12:19pm
mahanum_aziz@bh.com.my



Hampir tiga perempat pelabur aset digital di Malaysia berumur di bawah 35 tahun. - Foto hiasan

KUALA LUMPUR: Bursa aset digital di Malaysia terus berkembang maju, dengan lebih 300,000 akaun baharu dibuka pada tahun ini, demikian menurut Pengerusi Suruhanjaya Sekuriti Malaysia (SC), Datuk Syed Zaid Albar.

Beliau berkata, sejak diperkenalkan pada 2019, jumlah aset digital yang didagangkan melepas satu bilion, dengan nilai melebihi RM16 bilion pada September 2021.

Katanya, penyertaan pengurusan pelaburan digital baharu atau DIM menyumbang kepada pertumbuhan segmen aset di bawah pengurusan, malah apabila pemegang lesen DIM membuka 90 peratus lagi akaun DIM tahun ini berbanding tahun sebelumnya.

"DIM juga terus menarik minat generasi muda dengan hampir tiga perempat pelabur berumur di bawah 35 tahun. Walaupun hampir 70 peratus pemegang akaun DIM adalah lelaki, akaun milik wanita telah meningkat hampir sekali ganda sejak Disember tahun lalu, langkah positif ke arah merapatkan jurang pelaburan jantina," katanya.

Beliau berkata demikian pada pada Persidangan Fintech SCxSC 2021 yang diadakan secara maya hari ini.

Syed Zaid berkata, platform kewangan alternatif, pendanaan ramai ekuiti (ECF) dan pembiayaan antara rakan setara (P2P) terus memenuhi dan menyokong keperluan pembiayaan perusahaan mikro, kecil dan sederhana (PMKS) di tengah-tengah cabaran pandemik COVID-19.

Beliau berkata, sejak penubuhannya pembiayaan ECF dan P2P membantu hampir 4,000 perusahaan kecil dan sederhana (PKS).

"Walaupun penurunan awal dalam aktiviti pengumpulan dana pada suku pertama 2020, platform alternatif ini pulih untuk membantu PKS mengumpul lebih RM1.3 bilion sejak April tahun lalu.

"Jumlah yang dijana menerusi ECF dan P2P pada separuh pertama 2021 masing-masing meningkat sebanyak 151 peratus dan 220 peratus berbanding tempoh sama 2020," katanya.

Syed Zaid berkata, selain itu juga, dana pelaburan bersama awam-swasta, Malaysia Co-Investment Fund (MyCIF) terbukti amat berkesan semasa pandemik, apabila penyertaannya memberi keyakinan kepada pelabur untuk terus melabur melalui platform ECF dan P2P.

"Pelabur swasta menyediakan pembiayaan tiga kali ganda berbanding pelaburan bersama kerajaan lebih RM260 juta sejak MyCIF mula beroperasi," katanya.

Persidangan fintech SCxSC adalah acara fintech utama SC untuk memacu perbincangan mengenai fintech dan pendigitalan dalam pasaran modal dengan persidangan tahun ini diadakan dari 26 hingga 28 Oktober secara maya bertumpu kepada teknologi kewangan dan kawal selia Islam.